



UKA2015/21
10. november 2015
Naaja H. Nathanielsen

Qalerallit avaleraasartuullu avataasiorluni aalisarnermi pisarineqartartut akitsuutaat pillugit Inatsisartut inatsisaata allanngortinneqarnera pillugu Inatsisartut inatsisaat nr. XX.xx.xxx 2015-imeersoq (Aalisakkat ikerinnarsiortut ilaasa Tunumi pisarineqartut akitsuutaat).

(Aningaasaqarnermut Aatsitassanullu Naalakkersuisoq)

Inuit Ataqatigiinni Nunatta Karsianut akisussaaqataarusuppugut. Imaannaanngitsumik inissisimanerput paaseqqissaarparput. Taamaammallu akitsuutinik nutaanik eqqussiniartoqarnerani akisussaaqataavugut. Illuatungiliuttuulluni itigartitsiinnarnissap aalajangiinissallu amerlanerussuteqartunut tunniutiinnarnissaa, kingornalu uparuartortinnissaq oqinnerpaatut aneriarfissaassagaluarpoq. Taamatut pisoqartarsimanagera takusareerparput.

Inuit Ataqatigiinni isumaqarpugut pisuussutivut tamatta pigisavut tamatsinnut iluaqutaassasut, taamaammallu qalerallinnut naliginnaasumik akiitsuusiinissamik Naalakkersuisut siunnersuutigisaat tapersorsorparput. Tamanna siunertaralugu missingersuut siulleq atorsinnaanngitsutut isigisimavarput, uparuartorinerpullu Naalakkersuisunit tusaaniarneqarsimammat, taamatullu nutaamik siunnersuusiortoqarsimammat nuannaarutigarpur.

Tamassuma siusinnerusukkut pisinnaasimanissaa kissaatigisinnaasimagaluarparput. Siunnersuut nutaaq ulloq 6. november Aningaasaqarnermut Ataatsimiititaliami tiguarpur, aqaguanilu 7. november isumaliutissiissut tunniuttussaallugu. Tamassuma pinginnerani siunnersuut kattuffiit akornanni ullup unnuallu ingerlanerani pipallattumik tusarniaavigineqarsimavoq. Taamatut ingerlatsineq takullugu tulluusimaarnangeqaaq. Uagut tungitsinnit isumaqarnarpoq taama tukatsigisumik inatsisiliornermut taarsiullugu Inatsisartut kusanarnerusumik suleriaasissaqartinneqartariaqaraluartut. Tamannarpiarlu tunngavigalugu akitsuutit akuerinissaat imaluunniit akuerinnginnissaat pillugu Inuit Ataqatigiinni annertuumik nalornineq aqqusaartariaqarsimavarput.

Akisussaaqataarusuppugut. Taamaattorli inatsisiliornerup aallaqqaataaniit sukumiisumik eqqarsaatersorfigineqareernissaa qulakkeerusuppurput. Tamanna tunngavigalugu inatsimmut siunnersuutigineqartup suliarineqarnerata pingajussaaneertinnagu Aningaasaqarnermut Ataatsimiititaliamut uterteqqinnissaa siunnersuutigerusuppurput, taamaalillunilu siunnersuutigineqartoq Aningaasaqarnermut Ataatsimiititaliami siunnersuut misissoqqinneqarsinnaavoq, tassanilu avataasiorluni qalerallinniarnermut tunngasut immikkut isummersorfigineqarsinnaallutik. Tamassuma tungaatigut akitsuut kilo-mut kr. 3-miit kr. 2,5-imut appartinniarneqarpoq. Avataasiorluni alisarnermut akitsuutigineqartup appartinniarneqarnera isumaqarpugut erseqqissarnerullugu oqaluuseqqittariaqartoq. Siunnersuutigineqartup Aningaasaqarnermut Ataatsimiititaliamut utertinneqarneratigut tamanna pingajussaanic saqqummiutinnginnerani pisinnaavoq. Inatsisissap suliarineqarnerata qanoq pipallatsigisumik suliarineqarsimanagera eqqarsaatigalugu uagut tungitsinnit isumaqarnarpoq taamaaliorneq pissusissamisoorluinnartoq, partiillu allat taama ingerlatsinissamut isumaqataanissaat neriuutigilluinnarparput.

Taama oqaaseqarluta nalunaarutigissavarput inatsit saqqummiunneqartoq maannakkut taaseqataaffigissannginnatsigu, taamatulli pingajussaaneerineqartinnagu Aningaasaqarnermut Ataatsimiititaliamut utertinneqarqinnissaa inassutigissallugu.